

видя пустыню и возрадовался душою, что место угодно вельми и повеле Сихеме себя затворити извну дверцы и замкнути пустыню, а ключи, отъехав от себе, повеле кинуть в реку и заповеда никому о себе поведати. И нача Григорий богу молитися и слезы ко слезам прилагати. И потом времени много минувшем умре папа римский Фармусий и совет сотворше вси граждане и князи и бояря и велможи и воеводы и архиепископы и епископы

л. 68 об. || и весь причет церковный, кому в Риме папою быти. И начаша наместницы местити меж собою, кого бы на тот святительский престол избрати, и многи от них погибоша мечем сами меж собою. И бысть с небеси глас глаголющ, яко гром: «Поищите вы миром человека божия, а он некоем месте за весь мир молится, а имя ему Григорий». И вси граждане начаша богу молитися, да явит им господь человека божия Григория. И на молитве вторые с небеси глас бысть всему миру: «Ищите того с Сихемою, а живет в Ыльине улице, тот вам укажет, ему ведомо о нем, уж тридцать три лета в пустыни; тому подобает в Риме у вас папою быти на святительском престоле». И взяли они Сихему, вельми муж стар, и поехаша с ним в судех архиепископы и епископы и весь чин священнический и не дошедше мало до пустыни, хотя они от многого путного труда отдохнуть и кинуша мрежю в реку и яша множество рыб и пререза щюку первую и обретоша внутреню чрева два ключа, и возрадовалися вси вельми и похвалили бога, а Сихема узнал, который ключ пустынный, он и замкнул его до пустыне, и поехаша они до пустыни с радостию и мнози прослезилися, зря на его пустыню угодную, и начаша ону молитву творити у пустыни и не бысть

л. 69 им гласа ни слуху, || и в третие сотворили молитву и глас бысть: «Аминь, братия». И архиепископы приложили ключ той, замок и отпаде по Сихемову слову, и вошли внутрь в пустыню к преподобному, и просветися пустыня яко солнце, а лице преподобнаго яко молния блещется, а власы его аки волна чиста, а брада у него аки белый снег. И пали вси на ногу его, прося у него благословения и омочая слезами землю и глаголя вси единогласно: «Отче святыи, тебе подобает в Риме папою быти, благослови и поиди с нами в Рим град на вселенский престол». И глагола преподобный: «Аз, братия, недостоин и многогрешен раб и никим незнаем, а zde на землю пришлец, червь, а не человек, поношение человеком и уничижение людем, не хошу на вселенском соборе папою быти: выше моя меры. Идите, братия, с миром отсюда». И глагола ерхиепископ: «Мы, отче, ис пустыни сея не возвратим без тебе, а ты не прогневай господа бога своего». И едва взявша его с нуждею великою и доиде града Рима и стретоса вси его, мали и велицы, и благословив их преподобный и вшед в црков преображение Христово и поставиша преподобнаго на престол папою, и начаша он люди учити день и нощ и беспрестани. По некоем времени лучися итти

л. 69 об. преподобному в црков на || праздник шествие святаго душа со множеством народа, и узре преподобный матер свою с южных страны грядущу царицу со множеством народа. И узрев преподобный матер свою Марию царицу и паде ей на ногу и плакав на мног час, прося от нея благословения. Царица глагола ему: «А яз от тебе хошу прощения получитьи грехов». И услыша преподобный от матери такая словеса (?) и возвратися в полаты своя и прося от нея благословения и облече ея в ангельский чин и повеле близ себе поставити полатку и труды к трудом прилагати и о матери бога молити со слезами и душою ея спасе, о госпде преставися в вечную жизнь. Преподобный погребе тело ея, матери своя, и по некоем времени отец его Василий услышав о сем и прииде ко граду, а преподобный Григорий, святым духом уведав яко отец его Василий прииде, и повеле его к себе всяти на покаяние и поведа отцу своему все порядку, да в туж полатку утверди, где